

MERI BUKA STRET

Poto i soim Mis Angelyn Tukana, wanpela meri i insait wantaim 11-pela narapela long resis bilong painim. Mis Papua Niugini.


Ret Kros i bosim dispela resis na i ting long winim K50,000 long en. Ol i pasim resis pinis na long namba 10 de bilong Desemba bai ol i votim husat i win. Long yia i go pinis, Ret Kros i bin winim K38,000 olsem; na i bin gat 30 meri i resis.

Wanem meri i kamap Mis Papua Niugini em bai go long Melbourne na i stap insait long narapela resis bilong painim husat i Kwin bilong Pasifik. Na long 1978 em bai go long hap bilong HongKong bilong traim kamap Mis Esia.


Meri bilong dispela poto, Mis Angelyn Tukana, em i hostes o boskru long bikpela 707 foa ensin smokbalus bilong Air Niugini. Em dispela kain i save flai namel long Port Moresby na HongKong, Manila, Japan, na Australia.

Angelyn em i gat 20 krismas na em i wanpela meri Buka stret, long wanem em i kam long liklik ples Suhin/Buka long Not Solomons Provins. Long las yia em i kisim prais insait long Air Niugini olsem namba wan hostes bilong ol.

(Veronica Williams poto)



Poto antap i soim PNGS BUNA, em wanpela sip bilong Difens Fos bilong yumi. Em i wanpela kain bikpela pang inap long kamap stret antap long nambis, maski bris. Hia em i redi long go raun long Cairns, Townsville, na Brisbane. Em bai kam bek long Krismas taim. Dispela tok PNGS long nem i min: Papua New Guinea Ship. Ami Poto



Papua New Guineans' own national weekly in Melanesian Pidgin

Editorial Offices:

Box 1982
 Boroko
 Phone: 25.2214
 25.2552
 Telex: NE 22213

Branch Offices:

Wewak
 Phone: 86.2479

Wabag
 Box 111

Australian Advertising Representative:

Kevin Engel
 8 Duraba Pl.
 Caringbah (2229)
 N.S.W.
 Phone: 525.6263

Subscription rate:

Annual: K8.00



Poto long lephan i soim Misis Nesta Pearson, Stan Ona, Karolus Ketsimur, na Tom Pearson. Ol i stap insait long wanpela resis singsing long kantri Turkey, we ol i bin kamap olsem deliget bilong NBC insait long Esia Pasifik Brotkas Yunion.

Olgeta deliget bilong dispela konprens i bin wokim wanpela liklik program bilong ol yet bihain ol wok bilong ol i pinis. Na dispela tim bilong PNG i winim olgeta arapela na i kisim namba wan ples. Ol i singsing "Wokabaut i go long Sainataun".

Mista Karolus Ketsimur em i dairekta bilong ol program long NBC. Na Mista Stan Ona em i wanpela kadet ensinia. Tupela wantaim i bilong Not Solomons Provins.

Dispela foto i kam long Redio na Televisen bilong kantri Turkey. Stori i kam long Stan Ona. Tenkyu.

OL SMOLPELA FAMA I WIN

Dispela stori i kam long liklik buk, nem bilong em i NEW INTERNATIONALIST. Em i save stori long olkain wari bilong developmen. Em i save kamaut 12 taim long yia na i kostim K14 bilong wan yia. Yu ken baim long opis bilong Wantok niuspepa.



WANPELA AS BILONG TRABEL EM HIA :
OLGETA GADEN NA FAM I SMOLPELA TUMAS.
SAPOS YU GAT BIKPELA FAM NA MASIN, YU
INAP GROIM PLANTI KAIKAI.

EM I NO TRU OLGETA.
LONG SMOLPELA FAM
YU NO WESTIM PLANTI
SAMTING.




LONG INDIA MIPELA
GROIM TRI TAIMS
MOA KAIKAI LONG
OL LIKLIK FAM



LONG AMERIKA TU WINMANI
BILONG WAN WAN EKA I MOA
LONG OL LIKLIK FAM'

TASOL YU KEN SAVE HARIAP LONG DISPELA SAMTING, SAPOS YU LUKIM OL PASIN BILONG SMOLPELA FAM



LONG SMOLPELA FAM YU INAP GROIM ABUS
NA KAIKAI LONG SEM SPES .

YU PLANTIM OL KAIKAI LONG HAN
NA OLSEM WAN WAN LAIN KAIKAI
I KLOSTU KLOSTU.

YU INAP SENISIM KAIN KAIN
KAIKAI BILONG GRISIM GRAUN.

YU KEN GROIM OLKAIN
KAIKAI LONG SEM GADEN.

MIPELA I MAS GROIM
PLANTI KAIKAI LONG
LIKLIK SPES - BAI
MIPELA I GAT
KAIKAI.






SAPOS TOK BILONG YU I TRU,
NA OL SMOLPELA FAMA I SAVE
GROIM KAIKAI ISI, WATPO OL
I HANGRE ?

BIKOS PLANTI I NO GAT
GRAUN BILONG OL YET.
LONG SAMPELA KANTRI
OL MANIMAN I BOSIM
GRAUN NA OL RABISMAN
I NO GAT GRAUN LONG
WOKIM GADEN.



NA SAPOS OL I PAPA BILONG GRAUN, OL I NO INAP YET LONG KISIM HELPIM LONG GAVMAN.


LONG KANTRI PAKISTAN
MIPELA I NO INAP KISIM
DINAU BILONG WOKIM PAM
NA HUL WARA SAPOS
MIPELA I NO GAT 12
EKA GRAUN . WAN WAN
TASOL I GAT



SAPOS MAN I GAT
GRAUN PINIS, EM
INAP KISIM DINAU
ISI MOA. MAN I
NO GAT BIKPELA
GRAUN I LUS LONG
HAN BILONG OL
TRIKMAN.

NA MI NO LAIK KISIM
BIKPELA DINAU LONG
BAIM GRIS BILONG
GRAUN . SAPOS TAIM
NOGUT I BAGARAPIM
GADEN, MI LUS
OLGETA.

OL MANIMAN I SAVE TRAIM TU
NA EM I NO PRET. WATPO YU
NO WOK WANTAIM EM ? ATING
EM I GAT SAMPELA AIDIA.



OL MANIMAN I NO
SAVE TAITIM BUN
NA KAMAPIM OL
NUPELA AIDIA.



LONG KANTRI MEKSIKO, GAVMAN I HELPIM
OL MANIMAN I GAT BIKPELA FAM INAP 14
YIA BIPO OL I BIN TRAIM OL NUPELA KAIN
KAIKAI LONG GADEN.



NA INAP NAU LONG OL DISPELA BIKPELA
FAM TRU, 80 BILONG OLGETA 100 FAM I
NO INAP RAN OLSEM BISNIS TRU.



AS BILONG DISPELA SAMTING EM HIA:
BIKPELA FAMA I NO PUTIM SAMPELA MANI
BEK LONG HELPIM FAM, NOGAT. EM I
WESTIM LONG DRING NA BIKPELA KA.

SAPOS FAM I BIKPELA O SMOLPELA, EM I SAMTING NATING.
BIKPELA SAMTING EM HIA: FAMA I MAS BELGUT LONG WOK FAMA BILONG EM.


LONG KANTRI SAINA OL I GAT BIKPELA
FAM, TASOL OL WOKMAN BILONG FAM I
BOSIM WAN WAN HAP GRAUN BILONG EM
YET. OLSEM NA EM I SAVE WOK GUT.



NA TU SAPOS
GADEN I KARIM
GUT, ORAIT
MIPELA WAN
WAN I SAVE
KISIM MOA.

OLSEM :

- * SMOLPELA FAM I KEN
KARIM MOA KAIKAI
LONG WAN WAN EKA .
- * TASOL ROT BILONG OL
SMOLPELA FAMA I PAS
BIKOS EM I HATWOK
LONG KISIM DINAU.
- * MASKI FAM I SMOLPELA O
BIKPELA , EM I SAMTING
NATING. WAN WAN FAMA I
MAS PILIM OLSEM, HATWOK
BILONG EM I HELPIM
EM YET.



NIUS BILONG OL MERI



LAE KIBUNG BILONG YWCA

Long 10 inap 13 Novemba i gat bikpela kibung bilong 49 YWCA deliget long Lae. Planti arapela pipel tu i bin kisim singaut long kam long dispela miting.

Dispela taim bai ol i traim painim planti aidia long nupela pasin bilong sindaun bilong ol meri bilong tude. Long Fraide bai ol i toktok long pasin bilong ol meri long ol liklik ples na olsem wanem ol i ken groim gutpela kaikai, na yusim sampela nupela kain tul na pasin bilong helpim wok bilong ol, olsem wanem ol i ken winim wan siling bilong ol stret.

Misis Marion Cast, save-meri bilong yusim olkain kaikai long wok marasin, en bai toktok long olkain gutpela kaikai ol meri i ken painim long ples yet. Na em wantaim tim bilong en bai kukim sampela long ol dispela kain kaikai na olgeta deliget meri i ken

traim. Long Sarere bai ol i tingting na skrapim tok na paitim tok long ol wari bilong ol meri i stap long ol taun. Bai ol i toktok long pasin bilong kain kain haus long taun, olsem wanem ol taun meri i ken painim kain kain wok, na olsem wanem ol meri i ken bung wantaim na senisim ol lo.

I gat bikpela YWCA long Lae na Moresby. YWCA em i min: Asosiesen bilong ol yangpela Kristen meri (Young Women's Christian Association). Na wok bilong em i bilong helpim ol Kristen meri i kamap gutpela meri na mama na helpim ol i wok gut insait long komyuniti.



Poto antap i soim pasin bilong man na meri marit i sindaun kaikai long Polynesia, em i ol wansolwara i stap long hap sankamap. Na poto daunbilu i soim wanpela yangpela meri Sepik i wok long wasim saksak insait long wanpela olupela kanu.



OL MERI WES SEPIK KIBUNG LONG NAMBA WAN TAIM

Long Vanimo taun long Wes Sepik Provins long Oktoba, Provinsal Komisina, Mista Benson Gegeyo, i bin opim namba wan kibung bilong 100 meri i makim ol ples i klostu long Vanimo.

Komisina Gegeyo i bin tokim ol meri long kibung olsem. Em i taim nau ol meri yet i kirap mekim sampela komyuniti wok long laik bilong ol pipel long ples. Na maski long sindaun nating na wetim ol sampela pipel i go mekim wok.

Benson Gegeyo i bin amamas long lukim ol man i makim ol dipatmen bilong gavman na misin i bin go na givim sampela toktok long ol meri long dispela kibung bilong ol. Ol i givim planti ol gutpela smatpela aidia long ol.

SINGER



**PREN
BILONG YU
INAP OLTAIM**

The Singer Company

PAS I KAM LONG OL PIPEL

PAS I KAM LONG AMERIKA

Dia Edita - Long Wantok namba 184, Ogas 1977, mi bin ritim liklik stori long ol lokal pipel tru bilong Australia.

Mi wari long wanpela hap tok i stap insait long dispela stori i go olsem: "ol i man bilong spak tru."

Na mi ting olsem sapos sampela lokal pipel bilong Australia i ritim dispela hap tok long ol long Wantok, ating ol bai i kalap nogut tru. Nating bai ol i laik askim:

"Olsem wanem yupela long PNG i laik makim mipela olgeta i man bilong spak tru?"

Tru tumas, sampela bilong mipela i save spak. Tasol dispela pasin i bin kamap long PNG tu na long planti arapela hap."

Orait nau mi ting olsem yupela ol Wantok i mas stretim dispela hap tok yupela i bin rait long ol lokal pipel bilong Australia.

Sister Wendy Flannery,
Chicago, U.S.A.

SEL KOKONAS HET

Dia Edita - Mi laik autim liklik wari bilong mi. Wari bilong mi i go olsem: Mi save wok long Achipale Konstrata Kampani long Aitape taun.

Mi save lukim long ai bilong mi yet na mi no amamas tru. Mi bin lukim ol samting ol raskal o man nogut i bin wokim.

Ol i save brukim stua na stilim samting. Mi pilim dispela pasin i no stretpela tru.

Mi ting ol dispela ol raskal, het bilong ol i olsem sel bilong kokonas.

Ol i katolik o ol i stap long pasin bilong tambaran? Bilong wanem ol i laik stil?

Na tu Aitape em i wanpela liklik taun stret. Em i

no bikpela olsem Port Moresby o Rabaul, na ol dispela liklik grup. raskal het i olsem sel kokonas i save bihainim ol pasin bilong ol arapela raskal. Em tasol liklik wari bilong mi.

Sapos yu husat raskal i bel hevi, rait tasol. No ken wet bai warai i wasim yu. Tenkyu.

Hilong Papalewo,
Aitape/W.S.P.

KAM NA MARITIM MERI NAMBIS

Dia Edita - Hia nau mi laik bekim pas bilong brata hia Michael Kondi bilong Banz/W.H.P.

Mipela long Nambis mipela i no save baim meri long bikpela mani. Tu mipela i no save baim meri long pato, kakaruk, muruk, na tu long gras bilong pisin. Mipela i save baim meri inap olsem K200 o K300 wantaim tupela o tripela kol o ston mani bilong tumbuna.

Sori tru brata dispela pasin em i bihainim pasin bilong tumbuna bilong yu. Mipela long Nambis tu mipela i save baim meri long pasin tumbuna o kastam bilong mipela yet.

Sapos brata yu pilim i hat tumas long yu long marit long Hailans brata, kisim tasol balus na i kam long wanem hap bilong Nambis, na kisim meri long Nambis. Na yu ken baim meri long liklik mani tasol.

Mi amamas tasol long ritim pas bilong yu. Na tu mi amamas tru long bekim ol belhevi i stap long bel bilong yu. Em tasol brata Michael. Tenkyu long askim bilong yu.

Moses Winka,
Kubalia/E.S.P.

SASIM MAN STRET

Dia Edita - Mi laik givim o tokim wari bilong mi i go olsem long ol plisman long taim ol i save harim kot. Mi gat tupela samting bilong tokaut.

Taim ol jas o ol man bilong harim kot ol i save

kisim mani long kot, mi laik tok olsem: Wanpela man i mekim trabel long wanpela meri na dispela meri i go na kotim dispela man.

Na taim tupela i sanap long ai bilong jas na autim tok bilong tupela, orait, dispela kot i go long man. Na man i baim kot.

Watpo mani ya i go long ol plis fan na ol i no laik stretim wari bilong meri long ol i ken givim mani ya i go long meri na i no long plis.

Sapos ol plis i painim wanpela man i spak na i mekim nabaut na ol i holim em bai sasim dispela man i baim kot, em i orait.

Dispela mani i ken i go long plis fan. Bikos em i no mekim trabel long wanpela meri o man.

Em tasol dispela liklik wari bilong mi. Sapos yu husat man i go egensim mi o i laik sapotim mi, raitim pas i go long Edita na mipela olgeta i ken lukim.

Kuimo Kamis,
Kimbe/W.N.B.P.



WEWAK MAKET WIN

Dia Edita - Hia mia laik autim na bekim pas bilong brata Francis Kotbui long pas bilong em long namba 15-10-77. Em i tok buai i no kaikai.

Long tingting bilong mi ol i putim 4-pela buai em i gutpela liklik.

Brata mi ting sapos yu lusim Wewak na i go long ol sampela maket long arapela provins, plis nating bambai yu wari long lukim 1, 2, o 3 long 10 toea.

Tasol em i gutpela ol i save salim 4-pela buai long Wewak maket em i gutpela tru, na maski long toktok planti.

Mi save em i no kaikai. Tasol em i gutpela long mekim yu amamas taim yu pilim les.

O sapos yu wok yu traim kaikai buai bambai wok i pinis kwiktam. Brata yu no ken wari long buai na rait olsem. Mi ting ples bilong yu i klostu tasol.

Sapos yu lukim ol i salim fopela buai yu traim na tromoi lek tasol na kisim buai long ples bilong yu.

Mi ting olsem sapos yu wanpela man bilong kaikai buai tru plis traim lusim Wewak na go long Moresby o Lae. Wantok yu bambai lukim 1, 2 o 3-pela buai long maket.

Man olsem yu tok Wewak maket ol i salim fopela buai i no stret.

Tasol long tingting bilong mi em i gutpela ol pipel i salim fopela buai. Em tasol bekim bilong mi.

Brata Francis sapos yu gat sampela moa, rait tasol long Wantok Niuspepa. Tenkyu.

Peter H. Jerry,
Turinghi/Wewak.

ASUA BILONG HUSAT

Dia Edita - Mi i gat bikpela wari tumas long provins bilong mi na mi rait i kam long yu bai yu raitim long Wantok pepa.

Em i olsem: Planti lain insait long Enga Provins i pait tumas long graun na pik na meri. Gavman bilong Enga Provins i traim hat, tasol pait i no inap long stop.

Bai mipela i mekim wanem? Mipela i blemim ol man long ples o ol kaunsil na komiti na ol bikman long ples i les tumas na pait i go yet long planti ples.

Mi ting kaunsil na komiti bilong dispela hap i gat pait long em i les tumas na i no gat pawa long kalabusim man.

Ol man i lukim dispela na ol i tok. Ol kaunsil na

komiti ol i les man, i no inap long helpim mipela na ol i stat pait na planti man i save indai. Na gaden na haus i save bagarap long taim bilong pait.

Mi tu mi lukim ol i statim wanpela kain kot ol i kolim, viles kot. O sori tumas. Dispela em i no gat pawa long stopim pait na ol samting long ples.

Ol i tok: Em i samting nating na em i no inap long helpim man i gat trabel. Tumas wantok sistem i save kam na i no stret.

I no longtaim i go pinis, ol Diwapin traib i stap klostu long Wabag ol i kukim wanpela viles kot haus ol i bin wokim.

Long wanem, ol i ting em i no inap long helpim ol long wari bilong ol.

Long wanem, planti wantok sistem i save i go insait long taim bilong kot na kaunsil na komiti ol i les tumas long bringim ol man i gat trabel long kot olsem na pait i save stat kwik.

Pait i stat, planti man i save kisim bagarap na indai. Asua bilong husat stret?

Mi laikim nau tasol gavman bilong Michael Somare i mas mekim wanpela lo long givim moa pawa long ol plis bai ol i kalabusim olgeta man i stap insait long pait na i mas i go kalabus inap long wan yia samting, bai ol i pilim.

Na tu ol i mas givim bikpela mekim save long ol kaunsil na komiti bilong lain i statim pait. Long wanem, ol i mas wok hat tru long stopim pait na ol samting. Tasol taim bilong kros, ol i save kisim banara kwik na ol i save statim pait.

Em tasol liklik hap tok bilong mi. Na sapos wanpela man o meri yu lukim dispela na i laik long sapotim mi, orait, rait tasol i go long Wantok bai mi lukim.

Moses M. Pyapene,
Wabag/Enga

WOK FAMA I GUTPELA BISNIS

Long Sande, de namba 30 bilong Oktoba, Mista Julius Chan, minista bilong praimer industri - em i min olkain wok fama na didiman - i bin autim sampela gutpela toktok na mipela i laik prinim hia.

Dispela em i namba 18 taim biktaun Lae i bin wokim wanpela so bilong ol samting olsem, long mekim ol fama i ken resis na amamas long kamapim olkain gutpela samting. Na bai tu ol pipel bilong taun i ken lukim na laikim.

Mista Chan i mekim ol dispela kain tok: Inap nau ol fama i no bin kisim namba long ai bilong ol pipel.

Tasol wok fama em i wanpela spesel we bilong sindaun na wok na i save mekim man i belgut tru. Long wok fama man i fri. Em i no kalabus olsem ol man insait long taun o faktori o woksap o ofis. Fama em i bosim em yet. Em yet i makim ol aua bilong wok bilong em. Em i holidelong laik bilong em. Na em i no mas go askim wanpela man pastaim long tok orait. Nogat.

Na tu pe bilong wok fama i ken gutpela tru. Yu lukim, i gat planti fama long Hailans i groim kopi na i save winim moa mani olsem ol pablik sevana na memba bilong palamen insait long gavman.

Olsem ol yangpela pipel bilong mipela, i mas tingting gut long wok fama. Yumi mas tok amamas long wok fama, bai ol yangpela pipel i laikim. Na tu gavman i ken traim

mekim pasin na sindaun bilong ol pipel long ol liklik ples i gutpela na i naispela. Olsem bai ol yangpela pipel i no skrap tasol long ranawe i go long ol biktaun.

Ol fama tu i mas tingting long dispela samting: ol i gat bikpela wok long mekim go het dispela kantri. Fama i man bilong bosim graun.

Na graun em i nambawan samting tru bilong Papua Niugini. Graun em i samting olgeta man i laik holim. Sapos em i no gat graun, em i rabis tru. Man i gat graun, em i ken groim kaikai - em i no mas hangre.

PASIN GO HET I NO MIN BISNIS TASOL

Long yia i go pinis, taim mi stap minista bilong fainens, mi lukim planti man moa i askim long dinau bilong mekim planti kain wok olsem rot na haus sik na skul. Na samtaim tu ol i laik wokim taven na hotel na wok PMV, na petrol stesin na

haus piksa na kain samting olsem.

Tasol i gat wan wan lida tasol i bin kam askim long dinau bilong statim o mekim go het gut sampela wok didiman o wok fama o wok plantesin.

Mi wari long dispela samting: planti pipel tumas long PNG i ting developmen o pasin go het, em i min go het long olkain pasin bisnis. Tasol wok fama na didiman em i olsem pilo aninit long olgeta arapela kain wok. Wok bisnis em i no inap go het hariap bikos i no gat planti pipel tumas long PNG i ken baim kain kain samting. Mipela i no planti. Tasol ol dispela pipel i mas kaikai, olsem ol i nidim wok didiman na fama.

WOK FAMA EM I BISNIS TU

Mi minista bilong praimer industri, olsem na mi laik putim wok fama long namba wan ples tru bilong em. Sapos mi win long dispela wok, bai mi belgut tru. Wok fama em i bisnis



Poto antap i soim wanpela fama i lukaut long gutpela taro kanaka bilong em.

Infomesen Opis Poto

tu - olsem wanpela tret stua o PMV. Em i no narakain samting. Nogat.

Mipela PNG i baim planti kaikai tumas long ol ausait kantri. Long yia i go pinis mipela i bin lusim K70 milion kina long baim rais, tin pis, mit, plaua, na suga. Em i min K30 long olgeta wan wan manmeri long PNG. Long dispela

yia, em bai moa yet - bikos prais bilong olgeta samting i bin go antap. Mipela i mas statim pasin bilong groim ol dispela samting long PNG yet na sevim mani bilong mipela. Nau em i lus i go longwe long ol arapela kantri.

Tude planti kaikai i save kam long ol liklik ples; ta- (i go moa long pes 16)

TULTUL TITAN

BLARI DOK!

Titan (NG) Pty Ltd. P.O. Box 25 Lae Ph 423988, 423497

SAPOS YU NO LAIKIM WANKAIN TRABEL OLSEM MAMA YA, ORAIT, YUSIM TITAN GALVANES WAIA NETING O BANIS NA DOK I NO INAP KAIKAIM OL KAKARUK BILONG YU.

Wanpela nupela kampani, nem bilong em Treding Patna (Trading Partners Australia Ltd) i stat nau long helpim ol smolpela bisnismen i save salim ol kaving na bis samting long ol turis. Dispela nupela kampani bai raun long ol as ples yet na baim olkain kaving samting long ol pipel stret na long gutpela prais tru.

Dispela grup i bilong kain kain sios na i no ting long winim bikpela profitmani bilong poket bilong em - olsem ol kampani nating i save mekim. Dispela Treding Patna grup bai salim ol kaving samting insait long ol selebresen na pati na so bilong ol sios na komyuniti grup long Australia. Bai ol i gat sampela spesel stua tu.

Treding Patna em i wok wantaim Kaunsil bilong ol Sios bilong Australia, wantaim Katolik Rilif, na Sen Vinsen di Pol Sosaiti, na Yunaiting Sios Komisin bilong Wol Misin.

Mista Gerard Sigulogo, Pablik Rilesen Ofisa bilong Nu Ailan Provinsal Gavman i laikim na i sapotim tingting bilong primia Mista Robert Seeto, long kirapim wanpela spesel komiti bilong glasim gut na stretim olkain wari i save kamap namel long ol kain kain sios o lotu long dispela provins, bai ol sios lida i ken bosim na ranim na lukautim gut ol wok bilong ol i ran stret.

Bikpela tingting bilong komiti ya em hia: Ol i laikim bai komiti i mas bosim na yusim gut olgeta mani em ol i save kisim nating olsem helpim ol i kolim grent i kam long ol sampela ausait developmen grup olsem dispela ya ol i kolim: Faundesen bilong ol pipel bilong Saut Pasifik: na sampela wankain lain Oganisesen olsem.

Gerard Sigulogo i tok olsem: em i laik bai dispela mani i mas helpim sindaun bilong olgeta pipel long Nu Ailan Provins. Na tu, komiti i mas lukluk gut long tingting bilong givim wok bilong ronim sios i go long ol lokal pipel, bihainim tingting bilong gavman long lokalaisesen, o larim ol lokal pipel yet i ranim ol wok.

Em i tok dispela nupela komiti bai i gat ol memba i makim ol dispela dipatmen hia: Nesenel Gavman; Pablik Sevis Komisin; Provinsal Gavman; komyuniti na ol sios insait long provins.

Pasin bilong painim wok long ol dropaut

Planti ol saveman i ting, ol man i no gat wok na i stap raun nating long taun, em i wanpela bikpela wari o problem long ol kantri olsem Esia na Afrika. Long dispela tasol, ol i bin statim Intamediet na Apropriet Teknoloji long pinisim ol dispela wari.

arapela wari olsem hangre na sik nogut, em sapos Apropriet Teknoloji i givim wok long ol yangpela manki i stap raun nating long taun.

Planti bilong ol dispela yangpela manki, em ol i praimeru skul dropaut. Ol i no laikim wok fama. Na tu wok fama i no save givim

ol inap mani ol i gat laik long kisim. Olsem na ol i save go raun long taun na painim wok.

Intamediet o Apropriet Teknoloji i min olsem, ol pipel i mas yusim wanem samting ol i gat long viles. Na ol i no mas go na mekim ol long faktori. Bipo tru i gat ol pipel i save

wokim ol dispela kain samting long pasin bilong tumbuna. Tasol taim nupela laip i kamap, ol i lusim tingting olgeta long ol pasin bilong tumbuna.


Intamediet Teknoloji i min: ol pipel i yusim masin em liklik bulmakau i save pulim long brukim graun, na i no yusim trak-

ta. Na tu wokim ol tul, ol sospen, na su long samting bilong viles yet. Na i no wokim long ol faktori.


Wankain tu long wara ol i wokim liklik banis wara long graun tasol. Na i no yusim masin bilong pamim wara.


Long dispela we tasol, ol pipel long viles inap long kisim o winim mani

Ol inap long pinisim ol



THE INVESTMENT CORPORATION OF PAPUA NEW GUINEA





Long poto antap yumi ken lukim ol sampela man bilong Tari long Saten Hailans i sanpa kisim winmani bilong ol Invesmen Koporesen opis klostu long ol.

BAIM SEA LONG INVESMEN KOPORESEN
BILONG PAPUA NIUGINI

na bai yu kisim winmani bilong wanpela bikpela bikpela kampani tru

Sapos yu laik save moa long we bilong kisim winmani, yu rait long: Investment Corporation
P.O. Box 155
Port Moresby

NEM BILONG YU:

ADRES BILONG YU:

.....

MADANG MAN WINIM KA LONG RAFEL

Long Madang long 15 Oktoba tupela grup i bin pulim tiket bilong tripela wina bilong wanpela rafel, em ol i bin salim tiket bilong em inap sampela mun nau. Tupela grup ya, em Nesenel Katolik Sevis Klap na Sen Vinsen di Pol Sosaiti.

Man i kisim laki namba 4028 na i winim wanpela Mazda trak karamap, em Mista Robert Fricken bilong Siar Plantasin. Namba tu namba, em 2543, em i bilong Mista Barth Kap bilong TWA, Aitape. Em i winim wanpela kaset redio. Misis Agapita M. Bamatu bilong Alexishafen i bin winim tu wanpela kaset redio na i holim namba 3321.

Tupela klap i laik tenkyu long ol pipel i bin insait wantaim ol long painim mani bilong helpim wok bilong tupela. Nesenel Katolik Sevis Klap i wok long helpim ol lokal pris na brata na sista na studen long semineri. Sen Vinsen di Pol Sosaiti i save helpim ol pipel i rabis na i no gat haus o klos o kaikai.



Kirap long lephan long poto yu ken lukim: Therese Tinfele (seketeri), Moses Gabuogi (tresara), John Takori (presiden), na man i winim ka, em Robert Fricken.

Pater J. Jurczyga Poto

YAMAHA
YAMAHA

YAMAHA OUTBOT MOTA

ELA

MOTORS LIMITED

K998 - bilong moto i gat sotpela sap
 K999 - bilong moto i gat longpela sap

Dispela moto i gat strongpela bun tru bilong ranim ol bot bilong lukautim pis na bilong karim kago.

OLGETA MOTO I KAM WANTAIM LIKLIK KES I GAT SPEA PAT

PORT MORESBY	KIETA	WEWAK	LAE	MADANG	RABAUL
P.O. Box 75	P.O. Box 468	P.O. Box 581	P.O. Box 91	P.O. Box 110	P.O. Box 712
TEL. 25 4088	TEL. 95 6083	TEL. 86 2255	TEL. 42 1568	TEL. 82 2188	TEL. 92 1988


YAMAHA
YAMAHA

Minista Wari Long Ol Et Pos Odeli

Mista Wiwa Korowi, nupela memba bilong Sauten Hailans Provinsal long palamen na Minista bilong Helt, i tok olsem, em na dipatmen bilong em bai i lukluk gut long nupela tingting na aidia bilong em long stretim sindaun bilong ol et pos odeli long olgeta hap bilong PNG.

Minista bilong Helt i wok long mekim dispela toktok bihain long em i bin kisim planti moa ol pas i kam yet long ol et pos odeli i komplem long kain sindaun ol i bin kisim long Dipatmen bilong Helt yet, i kam inap nau. Ol i tok olsem, kain sindaun na sevis olsem i no amamasim bel bilong ol sampela et pos odeli em ol i wok insait long ol bikbus tru arasait long ol taun.

Wiwa Korowi i tok olsem, em i bin kirap nogut na i wari nogut tru long kisim sampela pas bilong ol et pos odeli i bel nogut long dispela sevis ol i wok



Infomesen Opis Poto
Mista Wiwa Korowi

long kisim nau. Na sampela bilong ol i bin tokim Minista long pas olsem, sapos dispela samting i go het yet, ol bai i mekim wanpela stap wok o ol bai i risain o pinistaim olgeta long Helt Dipatmen.

Olsem na Minista ya i tingting long helpim givim gutpela sindaun i go long ol et pos odeli hariap tru pastaim long dispela taim

yet. Long wanem, ol et pos odeli i save givim long namba wan sevis long komyuniti na helpim gavman long mekim kantri i go het.

Mista Korowi i tok em i wok hat long stretim olgeta wari bilong ol odeli long wanem em i tingting planti long ol gutpela wok ol i bin mekim inap planti ya.

Em i tok, insait long sampela mun, dipatmen bilong em i laik wokim wanpela program bilong stretim olgeta wari bilong ol et pos odeli.

Solwara givim sol


Poto daunbilo i soim wanpela saveman bilong Yunaitet Nesens, nem bilong em Mista C. Malhotra. Em i bin lukluk raun long Papua Niugini inap tenpela de bilong painimaut olsem wanem mipela inap long wokim sol long solwara.

Em i laik traim dispela kain wok long hap bilong Papa; Lea Lea long Sentral Provins. Taim bilong san i laik kamap nau long dispela hap na em i bin redim sampela kain kain wok ol i mas traim. Ol bai wokim sampela smolpela raunwara na putim solwara insait long ol. Graun i mas gutpela bilong holim dispela solwara. Na ol i mas metaim tu hat bilong san, na hamas ren i save kam, na tu haiwara i kamap inap long wanem hap bilong ol nambis. Olsem tasol ol saveman i ken tokim gavman wanem ol ples long nambis i gutpela bilong kirapim dispela kain wok.

Sapos ol samting i ran gut, bai Opis bilong Bisnis Developmen i laik kirapim wok sol long sampela hap. Long wan wan ya Papua Niugini i save baim 3,500 tan sol na em i min K200,000. Mobeta ol pipel hia yet i ken winim ol dispela mani.

Mista Roy Mackay bilong Opis bilong Bisnis Developmen i bosim dispela wok. Poto bilong Mista Malhotra i kam long ol yet.

Yunaitet Nesens Poto



TERRITORY NET SUPPLIES
Box 5860, Boroko, Tel. 25.6700

Namba wan ples bilong baim olkain samting bilong wokim umben: string, rop, twain, let, flot, nil bilong samap.

Rait na askim mipela long prais bilong ol.


Johnson

AUTBOT

i strongpela

gutpela

poroman




J2 6h.p.

Yu ken baim na ol i ken fiksime long:

STEAMSHIPS MACHINERY
na long

OLGETA WOKSAP I SALIM JOHNSON AUTBOT



YANO BELO

MINISTA BILONG WOK NA SAPLAI

(Kagua Erave Open)

Mista Yano Belo i gat 36 krismas na mama i bin karim em long 1941 long ples Porani klostu long Kagua long Saten Hailans. Yano i no bin go long wanpela skul.

Long yia 1958 em i stap odeli long Erave haus sik. Na long 1960 em i holim wok long tanim tok bilong gavman.

Yano Belo i kamap memba bilong Kagua/Erave long 1968 na i kam inap nau. Em i minista bilong wok na saplai long las gavman tu. Em yet i bisnisman na i gat wanpela tret stua. Em i save tok Pisin, na tok Motu, na Kewabi. Em i bin go lukluk raun long Australia na Solomon Ailans. Em i bilong Katolik Sios.

Dipatmen bilong em i bosim ol dispela samting:
(a) Wok bilong baim ol samting bilong gavman.
(b) Wokim kontrak namel long gavman na ol kampani i save wokim rot na haus samting.
(c) Ol gavman stua.
(d) Wokim na fiksime ol samting olsem rot na bris.
(e) Lukautim na bosim ol haus bilong gavman.

INfomesen Opis poto



SKULIM OL HAILANS LONG LO BILONG BENG NA MANI

PAPUA NEW GUINEA BANKING CORPORATION

Sampela ofisa bilong PNG Benging Koporesen nau ol i wok long mekim spesel 3 mun lukluk raun long ol Hailans Provins. I kam inap nau, ol i bin i go na toktok wantaim ol pipel bilong Westen Hailans na Simbu pinis long we bilong yusim gut na putim mani i go long beng na kirapim olkain liklik bisnis insait long ples bilong ol yet.

Hetman o dairekta bilong PNG Benging Koporesen, Mista Bill Clark i bin tokaut olsem. Long las yia, ol ofisa bilong em i bin mekim wankain lukluk raun olsem long ol Hailans Provins. Tasol em i ting dispela tok save o skul bilong em i go aut long ol


pipel, i no pinisim laik bilong ol. Nogat. Ating sampela ol man bilong ples i mas lusim tingting bilong ol pinis long gutpela rot bilong putim mani long beng na kirapim bisnis bihain.

Em i save olsem ol pipel long dispela hap i save groim na salim moa moa kopi na winim bikpela namba tru bilong mani long wok bilong ol, na ol i no save na klia gut tru yet long we bilong lukautim mani bilong ol gut. Olsem na ol i mas kisim moa skul i kam long ol ofisa bilong PNG Benging Koporesen.

Bill Clark i laikim planti moa ol lokal pipel i mas insait long olkain bisnis long ol ples i arasait long ol taun. Nau planti viles

pipel tru ol i wok long seksek na tromoi mani i go aut nating long baim ol samting i kam long ol narapela kantri. Na tu planti taim ol i save spenim bikpela mani long mekim pati na sosol na planti arapela ol gutpela taim olsem long ples.

Long taim bilong Maun Hagen So long 6 na 7 Ogas, ol beng ofisa i bin i go insait tru long ol viles na soim sampela film na givim beng pepa na tokim ol long kisim pasbuk na sevim mani bilong ol long beng. Ol i bin brotkasim tu ol dispela toktok long ol lokal redio stesin bilong yumi long Hailans.



Cyclone

Joseph Hau wantaim sampela 200 bulmakau bilong em long 1,330 eka fam bilong em long Sogeri, Port Moresby.



Long Australia dispela kain banis igat 7-pela waia i win tru long banisim ol bulmakau. Waia bilong en i strong moa. Na 3-pela ret-pela waia (antap, namel na daunbilo), em inap long banisim tru olkain bulmakau.

Em i isi tru long sanapim dispela kain banis. Yu ken putim ol pos longwe longwe inap long 20 mita.

I gat wankain banis tu bilong ol pik na ol sipsip.

CYCLONE DOUBLE-GRIP (NEW GUINEA) PTY. LTD.

A subsidiary of Boral Limited

P.O. Box 804, PORT MORESBY, P.N.G.

Telephone 25.6744

Long Niugini : GOROKA 72.1653 LAE 42.3181 MT HAGEN 52.1169

CYCLONE



Liklik Tolai ples
i tok olsem :

MIPELA INAP

Wanpela grup bilong pulim na salim pis long Warangoi eria ol i kolim Ganai Fising Grup, i wok long go het gut tru long hap bilong Is Nu Briten Provins.

Ganai Fising Grup i bin statim bisnis ya long dispela yia yet, na pastaim em i bilong helpim vokesenel skul bilong ol.

I gat samting olsem 30 pipel i wok insait long dispela bisnis. Mista Joseph Lare i lida bilong en. Em i wanpela man i gat planti aidia long ranim kain bisnis olsem.

Ganai viles em i olsem 150 kilomita longwe long Rabaul, na tu i klostu tru long maus bilong Warangoi Riva. Long dispela tasol, ol i gat gutpela ples we ol i ken painim pis.



Dispela poto bilong Opis bilong Infomesen bilong bipo i soim sampela pipel long hap bilong Rabaul i bungim planti bikpela pis. Long dispela kain samting mipela i stori hia.

Mista Lare i tok, bipo Gavman i no save wari long ol, tasol nau ol inap pinis. Ol inap tru long skulim ol yet long planti kain samting.

Mista Lare i tok klia gen

olsem, pikinini bilong bikbrata bilong em, Joseph Kamge, i bin i gat liklik edukesen tasol, olsem na em i ting, em i gutpela aidia sapos ol pipel i statim bisnis bilong pulim na salim pis long helpim ol yet.

Bihain long dispela, ol pipel i bin go long Dvelopmen Beng long kisim dinau marfi.

Dvelopmen Beng yet i bin orait long askim bilong ol pipel. Long wanem, ol i

bin soim olsem ol inap tru long ranim dispela kain bisnis, na tu ol i helpim long dvelopim kantri i go het.

Dvelopmen Beng i bin givim dinau mani inap olsem K900, na Viles Ikonomik Dvelopmen Fan i bin givim K3,000 long statim dispela bisnis. Ol pipel yet i bin bungim K1,500.

Long dispela mani ol i bin baim 2-pela bikpela bokis ais, na wanpela Toyota trak. Long taim ol i no gat ol dispela ol samting, ol i save yusim umben bilong Dipatmen bilong Pramerai Industri long pulim pis. Na bihain ol i save go salim ol pis long ol skul long Warangoi eria.

Pastaim tru ol i bin statim dispela bisnis long K300 tasol, na ol i painim planti wari moa. Long wanem, ol i no gat transport, na tu i no gat gutpela bokis ais bilong putim pis insait long kamap kol. I bin i gat ol liklik bokis bilong putim ol ais blok tasol i stap. Dipatmen bilong (i go moa long pes 16)

SAPOS YU LAIKIM BATERI TRU YU BAIM DISPELA KAIN


KASET BILONG MAXELL

Em i namba wan tru



BATERI BILONG MAXELL

Em i save wok longpela taim tru



yu ken baim long :

HAGEMAYER (P.N.G.) PTY. LTD.

P.O. Box 673, MADANG
PHONE: 822445

P.O. Box 1428, BOROKO
PHONE: 256144

P.O.Box 63, RABAUL
PHONE: 922633

P.O.Box 90, LAE
PHONE: 423200

P.O. Box 11, MT' HAGEN

WAN MAN TU MERI KIRAPIM PLES

Bipo tru wanpela lapun man i stap long ples. Long wanpela de em i brukim wara. Nem bilong dispela wara em Bale.

Taim em i brukim dispela wara i go long solwara pinis na em i stat long painim pis-i go na taim wara i ran strong i go daun long solwara wantaim planti pis na ol gras bilong wara na olgeta kain kain pipia i go long solwara.

Long dispela taim yet, long wanpela ples nem bilong en Sera. Long ples Sera yet olgeta manmeri i go katim wanpela trausel long wanpela hap nambis ol i kolim Mam na long tok ples mipela i kolim Nausa. Na tupela meri tu i laik go kaikaim sampela trausel.

Taim tupela i go daun long nambis na tupela i lukim planti pis tru, si i tromoim ol i go sua long nambis. Nau tupela i no tingting moa long kaikai trausel wantaim ol. Nogat. Tupela i stat long bihainim nambis na kisim ol pis i

go, i go na tupela i go kamap long dispela wara lapun man i bin brukim long en. Na san i go daun pinis.

Na dispela lapun man i lukim tupela meri ya na em i askim tupela olsem: "Yutupela i meri tru o yutupela i tewelmeri?" Na tupela meri i tokim em: "Mitupela i meri tru." Na tupela meri gen i askim lapun man olsem: "Yu man tru o yu tewel?" Na lapun man i tok: "Mi man tru."

Nau ol tripela manmeri i marit na ol i stap i go inap nau ol i kamap planti manmeri moa yet na i kara-mapim ples olgeta.

Olsem na long dispela ples ol i kolim Leitre ol manmeri i kamap long wanpela man wantaim tupela meri. Em tasol liklik tumbuna stori bilong mi.

Augustine Kaiyon,
Erave/S.H.P.




BOROKO MOTORS

SAPOS YU GAT WOK-TINGIM FORD



Tractors
Equipment



Yu ken lukim nupela FORD TRAKTA long BOROKO MOTORS long olgeta hap bilong Papua Niugini. Na tu yu ken baim long Arawa Motors, na Sepik Engineers, na long Kimbe Bay Shipping, na Highlands Henei Goroka, na Higatura Motors Popondetta.



OL MEKENIK BILONG
MIPELA INAP FIKSIM
FORD
LONG OLGETA HAP

Mipela i gat planti spea pat na mekenik.

sol ol liklik fama i mas skul long yusim sampela nupela we bilong groim moa na moa kaikai. Long wanem, i gat planti man i stap long taun na ol i laik baim. Fama i no mas groim inap kaikai bilong em na famili bilong em tasol. Nogat. Ol taunman i wetim kaikai bilong em yet.

BAIM SAMTING BILONG PNG

Mipela tu i mas tingting long baim na laikim olkain samting bilong PNG stret. Yumi no mas bilipim olgeta tok gris i kamap long redio na i pulim yumi long baim olkain samting bilong ol arapela kantri. Nogut yu ting ol samting bilong ausait kantri i mobeta, na bilong PNG maski. Nogat. Yumi mas ting: Yumi mas amamas long yusim na baim samting bilong PNG stret.

Tude i gat planti man tumas i ting: gavman i mas helpim mi. Em i wok bilong gavman. Mi mas sing-

aut tasol, mi mas bikmaus, mi mas straik, mi mas stapim wok. . . na bai fama i mas traim helpim em yet.

Long dispela Morobe so yu ken lukim planti gutpela eksampel bilong dispela samting. Ol fama tu i mas bung insait long wanpela asosiesen bai ol tingting na aidia na wok bilong ol i gat strong. Olsem ol kauboi na kauman i bin bung insait long Asosiesen bilong ol Kauman. Bikipela grup olsem em i gat strong long toktok wantaim gavman, na skulim ol memba insait long en long pasin bilong mekim go het gut wok bilong ol, so pasin bilong salim ol samting long maket.

Wok fama i mas kamap olsem wanpela bisnis. Na ol yangpela pipel i mas laikim joinim dispela bisnis fama.



Nau i gat 42,575 ka na trak na trakta na motobaik i gat laisens i ran long ol rot bilong PNG.

SKUL NIUS

Namba foa sinia haikul long Papua Niugini bai op long 1978 long Passam, i no longwe long Wewak long Is Sepik. Mista John Vilivili, hetman bilong Sepik edukesen dipatmen i bin tok olsem.

Dyson Kampani i bin statim dispela haikul, tasol bisnis bilong em i pundaun olgeta na nau Watkins Kampani i skruim wok i go. I gat planti trabel i bin kamap namel long ol wokman bilong Dyson i no bin kisim pe na bipo ol i kros na i laik bagarapim sampela haus bilong skul.

Inap nau ol i gat sampela haus skul, haus slip, haus tisa, na tang wara i redi pinis.

MIPELA YET INAP

(i kam long pes 14)

Praimeri Indastri yet i givim dispela long ol long yusim. Tasol em i gutpela tumas long wanem, ol i save hatwok tru long putim ol ais blok insait long ol dispela bokis.

Na Lare i tok tu olsem, bipo ol i no save go longwe tumas long viles bilong ol. Long wanem ol i no gat transpot. Tasol taim ol i baim nupela Toyota trak, ol i save ran i go long Rabaul na salim pis bilong ol.

Long wanpela de, ol pipel i save pulim inap 200 o

300 pis i gat ol kain kain sais. Prais bilong ol dispela pis i stat long 20 toea i go inap long K20 olgeta. Ol pipel i save sasim ol man long sais bilong pis yet.

Grup ya i save gat wari i kamap long taim olpela kanu i bagarap. Nau ol i laik baim nupela moto kanu. Olsem tasol bai ol inap long ran i go long planti hap na hariap long pulim pis.

Olsem tasol ol dispela lain pipel i winim mani bilong ol Tolai pipel bipo ol i traim long baim tin pis i kam long ol ausait kantri.

Ulagunan

Mista Oscar Tammur, Minista bilong Edukesen, i laik traim sampela nupela pasin long ol haikul. Em ol pasin em yet i bin mekim na traim pinis long skul bilong em stret long Ulagunan, klostu long Kokopo namel long ol Tolai

Mista Tammur i bin tren pinis olsem praimer tisa. Na taim em i winim ileksen olsem memba bilong Kokopo long 1968, em wantaim meri bilong em Sofi, tupela i kirapim wanpela haikul bilong tupela stret. . .

Dispela skul i stat wantaim 12-pela manki bilong viles bilong Tammur famili. Nau i gat 540 studen long en. Na skul i go inap gret 10.

Dispela Ulagunan haikul i strong long helpim em yet, long sevim mani, na kisim kain save yu ken yusim long ples. I no buk save tasol. Ol sumatin i groim olgeta kaikai bilong ol, na sampela ol i salim long maket. Ol i gat ol pik na kakaruk bilong ol stret. Na ol i save wok kopra na tretstua na petrol pam.

K4. tasol SAMTING TRU..

bilong olgeta

tisa

laibreri

skul

Pulap long

- . poto
- . nius
- . stori tumbuna
- . ileksen nius
- . 500 pes olgeta

Hia em i K4 bilong mi. Yu salim Wantok buk i kam long mi.


NEM.

ADRES.

.

.

Salim i kam long: **WANTOK**
P.O. Box 1982
Boroko



KANTRI NIGERIA

SOIM ROT

Long planti kantri long Afrika ol i bin kisim tru independens bilong ol, long wanem gavman bilong ol i pas pinis insait long han bilong ol ami. Sampela kantri nau i wok long kisim bek pawa i kam long han bilong ol pipel. Em i dispela kain gavman yumi save kolim demokrasi, olsem yumi PNG i gat.

Namba wan kantri bilong soim rot long ol arapela long Afrika em Nigeria. Palamen bilong em i wokim nupela konstitusen nau.

planti arapela kantri long Afrika, i aninit long ami. Jeneral Yakubu Gowon bipo i bosim kantri na bikpela pait i bin kamap long hap kantri ol i kolim Biafra. Nau narapela jeneral bilong ami i bosim ol: em Jeneral Olusegun Obasanjo. Em i promisim ol pipel bai ol i kisim independens tru na pawa bai kam insait long han bilong ol pipel long yia 1979. I luk olsem em i tok tru.

Nigeria i bin gat trabel i kamap long pasin wantok. Olsem nau ol i bungim ol bikpela lain wantok long wan wan stet o provins na olsem tasol i gat provins long kantri tude.

Komisin bilong raitim konstitusen i bin pinisim wok bilong en long 1976 na nau ol pipel i paitim tok long olgeta rul bilong en. Na tu ol pipel i votim wanpela spesel grup save man bilong paitim tok bilong Konstitusen. Em i konstitusen asembli. Ol memba bilong em i mas vot orait long nupela konstitusen i ken stat long Oktoba 1978.

Taim ol pipel i votim ol memba bilong dispela asembli bilong konstitusen, ol i no bin votim wan wan bikos em i bilong wanpela politikal pati. Nogat. Wan wan man i sanap long gutnem bilong em yet. Na sapos em i winim ples long asembli, em i mas aut long wok politik o pablik sevis bilong em. Olsem nau i gat lain loman na tisa na pablik sevan na lida na hetman insait long dispela asembli. Dispela




NIGERIA Olusegun Obasanjo

Nigeria em i winim olgeta arapela kantri long Afrika long namba pipel bilong em. Em i gat 80 milion pipel - em i moa long ol pipel bilong olgeta arapela kantri long Wes Afrika wantaim. Na tu bikos ol i bin painim wel aninit long graun bilong ol, dispela kantri Nigeria i namba wan tru long winim mani. Long yia i go pinis ol i bin winim \$8,500 milion dola long wel tasol. Nau Nigeria i kamap lida bilong ol kantri long Afrika.

Tude gavman bilong Nigeria - olsem tu bilong

NIGERIA



asembli i gat 230 memba. Gavman bilong tude (em ami tasol) i bin makim 20 arapela memba bilong sanap olsem tokman bilong ol studen, ol meri, wok bisnis, wok nius, edukesen, pablik sevis, na ol wokman.

Ol Negria i wari long ol politikal pati bilong ol. Nau long dispela taim bilong asembli ol pati i tambu. Tasol ol bai kam bek gen bihain konstitusen i redi. Ol man i wokim kon-

stitusen i strong long dispela samting: politikal pati i no samting bilong wanpela lain wantok tasol; nogat. Ol i laik bai olgeta pati i gat memba long olgeta hap kantri. Tasol tude man i no save yet, bai dispela aidia inap long winim pasin wantok o nogat. Bipo dispela pasin wantok i statim bikpela woa na ol

lain Ibo klostu i bagarap olgeta.

Long dispela stori, yumi ken lukim olsem wanem Papua Niugini i yangpela kantri moa tasol i laik tru na em i winim pinis ol dispela wari na trabel i stap nau long planti kantri bilong Afrika bihain ol i kisim independens 10-pela yia bipo.

Tupela nupela tu ensin smokbalus, ol i kolim F28 i stat pinis long flai namel long Moresby na Lae na Madang na Wewak na Manus na Kavieng na Kieta.

Dispela kain balus i no gat koropela na i hariap moa, i hapim taim tru. Em tu inap karim 55 pasindia.

Tupela smokbalus i bin kostim K7,500,000 kina. PNG i baim long Nauru.

Tupela i stat long flai long 29 Oktoba. Namba wan ofisa bilong wanpela em Aria Bouraga bilong Sentral Provins. Em i namba wan PNG i kamap pilot bilong smokbalus. Em i flai 3000 aua pinis.



ol sios harim OLKAIN KASET TEP

C-45, C-60, C-90, C-120.

Planti Sios na Kristen grup na gavman dipatmen long Australia na Nu Silan i save baim long mipela.

TEP EM I AS TRU BILONG KASET.

Ol i TDK kaset tasol.
Kaset i gat ol liklik skru.
Mipela i gat spea pat bilong fiksime.

Rait long kisim spesel prais long Sios o Baibel wok.
Kisim tu wanpela fri kaset olsem eksampel.

DIRECT IMPORTS (NZ) LIMITED
P.O. Box 72, Hastings
New Zealand

Mipela ORIM AGENCIES i tok welkam long yu long Rabaul.

Mipela i papa bilong ORIM LODGE namba wan haus slip tru.

Bet na brekpas bilong yu = K8.50

ORIM'S BAR-B-Q INN

Namba wan ples long Rabaul long kaikai mit Bar-B-Q. Na mipela i gat laisens.



Ring: 92.2277; 92.2207
92.2020 - de na nait

PAS I KAM LONG OL PIPEL

K4,000 MOTOKA

Dia Edita - Yes mi bin ritim wanpela pas long dispela buk Wantok. Na mi laik bekim dispela pas. Dispela pas i go olsem:

Long Hailans ol i save baim meri long K1,000, K2,000, K3000 na K4,000. I no long Hailans tasol ol i save baim meri long K K4,000.

Long sampela hap bilong Saut Not Solomons tu ol i save baim meri long K1000 i go inap K4,000.

Na watpo? Taim ol sampela Hailans pipel ol i lukim mipela ol meri i wokabaut i go long taun ol i save kolim mipela K4,000 motoka.

Olsem long hap bilong ol i save daunim prais bilong ol meri. Na tu mi save harim olsem long hap bilong Moresby ol i save baim ol meri long K2000. Na K4000. Husat man o meri i bel kaskas long dispela pas. Em i wari bilong em. Tenkyu.

Barbara Tokson,
Buin/N.S.P.

GO AUTIM MISIS

Dia Paulus K - Yes mi laik askim yu long pas bilong yu bin raitim long Wantok Niuspepa long ol meri i maritim ol masta. Em olsem laik tasol bilong

mipela ol meri na man long marit.

Bipo yumi no save long ol waitman. Na ol i no save long yumi. Na nau ol i save long yumi olsem yumi wantok tru. Na husat i kam long ples bilong yumi na lainim yumi? Yumi yet o ol?

Olgeta taim yupela i save kros kros long ol masta long wanem samting? Yupela i ting yupela i gat save tru olsem ol?

Yupela longlong man. Nau tasol yupela i skul liklik na yu ting yu i gat save. Tasol ol i gat moa save. Maski yu no ken tok nabaut long ol waitman yu harim.

Yu husat tru yu lukim pas bilong mi na yu rait i kam long mi, mi wetim pas bilong yu. Na mi tokim yu Paulus. Ating yu lus tru long mipela i maritim ol masta?

Tarangu yu traim na maritim wanpela misis. Nogut yu krai tumas long ol meri na wari i kilim yu. Na bai yu i gat sik yu nogat sem long wari long ol meri.

Yu save em i kas bilong mipela i maritim ol masta. Bipo yumi kain kain. Dispela taim yumi kamap pinis olsem ol waitman. Planti taim mi save baim Wantok Niuspepa na man i save jeles tumas long ol meri i maritim ol masta.

Em win bilong ol na ol i maritim ol masta. Mi wanpela meri Lae. Mi maritim long masta tu. Olsem na mi bekim pas bilong yu Paulus.

Mi bin maritim long 1968. Na nau mi i stap wantaim em inap long 9 yia.

Em i namba wan taim bilong mi long rait long Wantok Nius. Long wanem, planti man i save kros tumas long mipela.

Olsem na yu husat i lukim pas bilong mi, yu ken salim pas bilong yu i kam long mi. Mi amamas long lukim. Mi no pret long pas bilong yu. Mi wetim pas bilong yu. Em tasol. Tenkyu.

Bensa Bala,
Lae.

SAVE LONG AS?

Dia Edita - Mi laik bekim pas bilong Joseph Waram bilong Nuku, Wes Sepik Provins. Yes wantok, yu i bin tok olsem Wes Sepik pipel i no gat tingting liklik long mekim kain kain wok.

Tasol taim bilong toktok long ol meri, em tasol ol i gat tingting long en. Yes wantok mi no klia long as bilong dispela tok tru wantok. Yu min long ol i gris long ol yangpela susa tasol? O wanem as tru. Em tasol mi gat askim long em tasol.

Monzo Sabua,
Bugandi Haiskul/Lae.



WET NA PINISIM LAIK BIHAIN

Dia Edita - Dispela em i namba wan taim bilong mi long rait long Wantok Niuspepa. Mi i gat liklik wari long putim kamap long Wantok Niuspepa. Dispela em i go olsem:

Long lukluk bilong mi long ol yangpela ol meri i save pait long olgeta taim bilong wanem kain ol pilai i save kamap long ol provins.

Long provins bilong mi stret long Wewak mi save lukim taim ol man i save i go pilai na ol yangpela ol meri i save kam na save pait long ol man.

Mi yet mi ting i no gutpela. Yupela i save sem long pait long pablik ples tu o nogat? Nating yupela ol meri yupela i no sem, ating.

Mi save sem long ai bilong planti man na meri. Na yupela nogat. Mi ken tok stret. I no wanpela taim tasol i luk olsem olgeta taim bilong pilai.

Sapos yu gat wanem kain laik long wanpela boi, okei wet tasol i stap. Na taim em i pinis pilai i kam aut, okei. Nau yutupela i ken i go na pinisim laik. Tasol i no ken pait long taim bilong pilai.

Yupela ol meri i save pait long ol man taim mi save lukim wanpela meri i gat boi pren bilong em. Orait taim em i no i kam yu narapela meri i go na toktok wantaim boi pren bilong em. Na taim em i kam painim em nau kros i

kamap. Pait tu i kam wantai. Em i luk olsem i no stret tru yupela ol meri i save wokim.

Wanem, yupela i painim ol man tru hia? Ating mi ken tok hamas tausen man i stap long dispela graun. Ating yupela ol meri i lus tru stret long man. Olsem na yupela i save pait long ol man.

Nating yupela ol meri i ting em i wanpela man tasol long dispela graun. Na yumi olgeta nating ol meri tasol. Olsem na yumi pait long wanpela man tasol.

Ating yupela ol meri i no sem liklik. Mi save harim yupela i save tok olsem: ol man i olsem dok stret i save raunim ol meri.

Na nau olsem wanem long yupela ol meri i save pait long man. Nating nau mi yet bai mi tok olsem: yupela i olsem ol dok meri gen nau i save pait long man.

Bikos em i wanpela man tasol i no planti man. Olsem na yupela i save pait.

Plis tru ol susa traim na lusim dispela kain pasin. Yupela i no ken wokim dispela kain pasin moa.

Sapos planti man long narapela kantri i kam lukim olsem em bai ol i go tok bilas i kam long kantri bilong mipela gen. So em tasol.

Lainus H. Okesagol,
Kubalia/E.S.P.

BAIM WANTOK

Sapos yu laik kisim WANTOK niuspepa i kam long yu stret olgeta wan wan wik bilong dispela yia, yu katim dispela tiket long sisis na salim i kam wantaim K8.00.

NEM BILONG YU:.....
ADRES BILONG YU:.....

Salim sek o mani oda inap long K8.00 wantaim dispela tiket i kam long:

**WANTOK
BOX 1982
BOROKO**

Sapos yu bilong wanpela skul o misin o grup na yu laik kisim moa olsem 10-pela WANTOK wantaim long olgeta wan wan wik, orait yu rait na askim mipela long spesel prais mipela i gat long man i baim planti WANTOK olsem.

OL I MAS DAI NAU

(Genesis 50: 15-26. Eksodus 1:1 - 2:2.)

Bihain ol i planim papa bilong ol, Josep wantaim ol brata i go bek nau long Isip, Tasol ol brata i pret yet bai Josep i bekim long ol nau.



Mipela inap mekim wanpela samting tasol. Tasol yumi wet inap yumi kamap long Isip.

Yes, ol famili i stap long Isip.

Long Isip ol brata i no westim taim



Kisim dispela pas i go long brata bilong mipela, Josep.

Josep i harim dispela tok na em i krai.

Bringim ol brata i kam. Ol i no bilip yet mi bin pogivim ol pinis long taim bipo.



Pas bilong mipela i gat tok bilong papa tasol...em i askim yu long pogivim mipela. Mipela inap stap slev bilong yu sapos yu laik. Tasol yu no mekim nogut long famili bilong mipela.



Yupela i no ken pret. Yupela i bin mekim rong, tasol God i bin stretim bek.


Olsem na inap planti yia ol brata i sindaun gut long Isip.



God i bin mekim gut long mipela.

Inap mi dai mi bai tenkim God na askim em long pogivim mi.

Taim Josep i lapun pinis emli singautim ol wanfamili i kam



Wanpela de God bai bringim yupela i goaut long dispela ples na yupela bai go bek long graun bilong ol papa... Taim yupela i go, yupela i mas bringim bodi bilong mi i go wantaim.

Ol man long Isip i krai sori long Josep i dai. Na sampela nupela bosman i kamap Nupela hetman i no laikim mipela.

Em i lusim tine long Josep yet i bin helpim Isip long taim bilong hangre

Bihain liklik, Josep i dai.

Nau trabel i ken kamap.



King i sindaun long bikpela bot bilong em long wara Nail na i go pas na lukim ol gaden na sipsip bilong ol Hibru.



Ating i gat tumas Hibru i stap long Isip. Sapos i gat pait, bai ol inap egens long mipela. Bai mi mekim wanem?

Long neks de em i go lukim ol man i wokim nupela haus.



Mipela i mas gat planti wokman moa.

Em nau, bai ol Hibru i mas kam wok olsem slev bilong mi. Bai mipela i no lusim mani, na bai ol i no inap pait.

Olsem nau olgeta de long tula inap tudak ol Hibru man i brukim bun long wok ol bikpela haus bilong ol Isip....



Tasol ol Hibru i strong



Ol i save wok hat tru tasol olgeta de ol i karim planti moa pikinini. King bai i no hepi.

King i harim ripot



Bai mipela mekim olsem: yupela i mas tromaom olgeta pikinini man i go long wara Nail.

Ol soldia i bihainim tok bilong king na i kilim planti pikinini man dai. Na oltaim ol soldia i raun i go painim ol...



Olgeta nait ol Hibru papa i go bek long haus na i pret ol soldia i bin kam



God, yu helpim liklik pikinini bilong mipela.



Alan Weeks Poto




Lephan antap: em ol tisa na studen bilong stadi grup.

Raithan antap: mekenik i skulim ol lo long ol bilong ka.

Lephan: independens selebresen.. Dumodi Wolaka, Junny Anakapu, Dainisi Wasi, na Charles Raithan: em Charles Ova wantaim kepten bilong pasis.

Daunbilo: Dumodi Wolaka na Charles Ova, tupela wokman bilong KB Bekeri i lukim bekeri long Melbourne.



Ol dispela poto long dispela pes i kam long wanpela bikpela kibung long Melbourne long Australia bilong ol sampela pipel i bilong MRA. MRA i min Moral Riarmamen.

Ol pipel hia i bilong olkain ples bilong wok na stadi na ol i bung long "Asian Pacific Centre". Ol i bung long kisim spesel trening long kamap gutpela Kristen wokmanmeri na gutpela lida inap long senisim pasin bilong pipel nabaut long ol.

Sampela spesel tisa i skulim ol long stori bilong ol bikpela man bilong olgeta kantri, long pasin tru bilong demokrasi, long wari bilong ol kantri i no gat mani o kaikai, long lo bilong God insait long ol wok bisnis. Bai sampela gutpela kain kain wokman i givim eksampel bilong laip bilong em. Sampela i tisa, i dokta, i nes, i mama, i studen, i wokman, i man bilong politik.

Dispela kos i save ran inap long 13 wik olgeta.



Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.